

Plenchi

Bèl a bati

Ta ora a trobe pa nos topa. **TRINNGGG TRINGGG** nos bèl a zona pa nos kòrdabu riba nos sita di tur djasabra. Nos ta ansioso pa e dia yega pa nos por topa. Bo tambe ta mesun kontentu di topa nos riba plenchi di skol. Korda ku bo por bisa nos kiko bo gusta i kiko no riba nos email : mail@rkcs.org. Si bo tin sugerensha pa nos semper ta bon bini. Nos ta den e wikent di Adorashon pa kontra e selebrashon di Kristu Rei. Nos skolnan a partisipá tambe manera tur aña na e mainta di adorashon aki. E aña aki e sede prinsipal tabata na misa de st. Famia. Un danki na tur ku a dediká tempu pa orashon. Nos mester resa pa otro mas tantu. No pa nos mes so. Forsa di resa pa otro ta hopi grandi i poderoso. Pidi bon pa otro kada bes ku bo por. Pidi bendishon i lùs, laga esakinan sali for di bo kurason. Kada bes bo ta tende hendenan ku a bai laga nos dor di aksidente grave, òf un malesa direpiente. Otro biaha di esnan ku ta malu pa hopi tempu i ta sufri di dolor. Pero e dolor mas grandi ta e abandono. E soledat di esnan ku ta largu malu. Nan hendenan ta keda sin bishitá nan paso nan no por mira nan sufri. E ta hasi nan dolor i nan ta keda sin bishitá e persona. Pero sa ku e dolor di e persona ta dòbel mas grandi. E no ke mirabu sufri pe, pero e ta alegrá kada ratu e mira of sinti un of otro forma di afeskhon i atenshon. Laga nos hasi esfuerso pa hasi bishitanan tambe ku no ta yena nos kurason ku alegria, paso esei tambe ta parti di bida. Nos tin ku enfrentá alegria i tristesa. Nos tin ku mira dolor den su kara i bisa e otro:

“ Mi tei pa bo. “Mi a stimabu ora kos tabata bon i awor ku bo no ta bon, nada no a kambia. Ora mi tabatin mester di bo i awor ku abo mester di mi, mi stimashon no a menguá.”

Bida tin dos banda òf dos kara. Pareu ku tristesa na un banda, aya banda tin alegria.

Awe ta nan mester di bo, bo ehèmpel ku bo duna ta importante. Si bo siña bo yunan duna atenshon na esnan ku por risibi so sin por duna mas ku un sonrisa di gradesimiento, òf tin biaha ni esei nan no por duna dor di nan dolor i amargura. Si abo ta ehèmpel di duna atenshon na esnan ku mester, nan ta siña ku mañan ora abo mester di yudansa i atenshon nan lo tei pa bo tambe. SI bo no mustranan ku ehèmpel kon tei pa otro, lubidá ku dia di bo nan lo tei pa bo.

Plechi tei pa bo tur siman. Danki na nos skolnan su akshonnan, nan logronan nos por kompartí e momentunan agradabel ku bo. Un felis fin di siman yená ku amor i atenshon.

Riba roster

Radulphus College ku anochi di konsierto.

Djamaris anochi Radulphus College su sector di Formashon kultural/artístiko a organisá un konsierto titulá:

"The 70's Up To Now". Big Band di Dennis Aalse a hana refuerso di e famoso kantantenan Kadir Snijder & Heinrich "Richi Rich" Pieters. A alumnonan di havo 4 & vwo 4 a disfrutá 2 ora largu di diferente tipo di músika. Danki na e dosentenan di formashon Kultural/artístiko pa e anochi speshal aki.





Den agènda

Fakansi di skol

- **19 desember pa 4 yanuari**

Dianan speshal:

20 nov. dia di internashonal di mucha.

27 nov. Kuminsamentu di Advènt

1 desèmber dia di enseñansa

Mi ta konta

Balor di trabou

Albert a tende ku su 3 amigunan di infansia na trahando riba e proyekto grandi di konstrukshon banda di su trabou. Den su ora di pausa el a Sali pa bai buska nan drechi.

Na entrada el a topa e promé amigu di dje, Hubert, pará riba un relèks. “Mi amigu Hubert, kontentu di mirabu, kon ta ku bo?”

Hubert a kontestá: “Atami aki ta traha manera un bestia ta mata mi kurpa. Mi ta spera ku pronto mi por hala kita for di e trabou fastioso aki pa mi disfrutá di mi penshun.”

Albert a sigui kana i a topa Maurisio para riba un fundeshi. “Mi amigu Maurisio, kon ta ku bo mi amigu. Hopi tempu sin wak bo. Kon ta ku bo?”

Maurisio: “Mi no por keha. Bo mes sa mester traha pa por kumpli ku kompromisonan di famia. Ta esei ta nos deber komo tata di kas.”

Albert a hisa su kara wak na laria i a mira su otro amigu Richard te den tòp di e edifisio ta balansá riba un plataforma. Richard a bira masha kontentu di mirami i ku un sonrisa i un bos fuerte a grita puntrami kon ta ku mi. E tin gana pa nos topa despues di trabou pa nos por comparti eksperenshanan. Na final el a bisami: Atami aki, trahando un skol bunita pa nos hóbennan por tin un bon lugá pa nan eduká nan mes. Sinta pa bo mira kon nèchi e skol aki lo bira.

Un prencipi

Djabierne 4 di Novèmber último Ancilla Domini VSBO a organisá su di dos Song festival.

Bou di guia di dos dosente Juf Magdalena, Juf Margaritha i tambe nos konsierge mr Winklaar. E meta di e aktividat aki tabata pa e alumnonan siña sali i usa nan talento. I tambe pa hasi algu great i apart pa e alumnonan di e skol.

Juff Magdalena a trèk e proyekto aki di yuda i coach e hóbennan for di inskripshon te na e dia di presentashon. 12 hoben a partisipá i kompetí sanamente pa e premio final. E premio mas popular i e ganador apsoluto a bai pa: Rose Joseph. Promé finalista a bai pa: Michelangelo Martina.

Segundo Finalista a bai pa: Kristy Balentin. I terser finalista a bai pa: Rachel van Rijssen. Nos huradonan tabata: Rachied Felida, Hunneley Felicia i Cizzle. Durante di e show nos tabatin presentashon di Dibo Doran. I na final di e festival presentashon di: Hunneley.

E kos di mas dushi tabata e echo kon e partisipantenan tabata apoyá otro inkondishonalmente. Nos sponsernan tabata: MCB, SUNSCAPE HOTEL, De Jong Sporthuis, Barberia Mel, Multipost, Babranis NV, Samson i Strakstrak barbershop. Un danki na tur nos sponsernan ku a hasi e Song festival aki posibel.





Mucha djispou

Joanne ta yega kas kontentu for di skol. E ta grita:

“mama, mama a bai bon na skol awe.”

Mama: “esta bon no mi yu, kontami e bon notisia.”

Joanne: “mama, mi tabata hopi serka pa haña un 10 awe na skol”.

Mama: “Kon asina mi yu, kiko bo tabata falta pa haña un 10?”

Joanne: “E mucha sinta serka banda di mi a haña 10.”